

Buscando un mihor calidad di servicio di transporte publico

Entrante awe Minister Otmar Oduber a establece un moratorio di 2 aña pa permisionan nobo di transporte publico

ORANJESTAD - Entrante awe 1 di februari, 2010 a drenta na vigor un moratorio pa permisionan nobo di transportacion di persona durante 2 aña cu lo finaliza dia 31 di januari 2012.

Manera Minister Otmar Oduber a indica for di cuminsamento, el lo a warda riba un estudio realiza dor di DOPV pa mira si tin mester of no di un moratorio y si esey ta e caso, cuanto e lo mester dura.

Awor ta asina leu cu e estudio a keda finaliza y e conclusion ta cu mester bin un moratorio durante 2 aña. A base di esey a bin cu un Decreto Ministerial cu ta drenta na vigor dia 1 di februari 2010 y ta finaliza 31 di januari 2012.

E 'nota van toelichting' di e moratorio ta indica cu Minister di Turismo, Transporte y Labor a mira e necesidad, despues di e consejo di DOPV, caminda ta pone atencion na e restructuracion di e servicio di transportacion di personanan, pa bin cu un moratorio di 2 aña.

Durante e restructuracion aki lo bay pone atencion special na e analisis di e servicio di transporte di personanan mirando e desaroyo di sector turistico y aumento di poblacion. E analisis aki lo wordo realizador di e constancianan di e trahadornan di e seccion di Inspeccion di DOPV. Ta trata aki di constancianan realiza durante controlnan di empresanan cu tin permisionan. Cu e intencion di haya mas datonan confiabel, intencion ta cu durante e promer mitad di 2010 tur e empresanan aki lo bay pasa den un control empresarial amplio.

Mas aleu por mira den e nota cu na October 1997 e

Minister di Trafico y Comunicacion di e tempo ey a bin cu un moratorio pa otorgamento di permisionan nobo di taxi y autobus pa un periodo di 10 aña. Dia 7 di December 2007 DOPV a conseha e Minister di Turismo y Transporte di e tempo ey pa por lo pronto no bay over na otorgamento di mas permisionan di taxi y autobus te ora e restructuracion di e servicio di transporte publico wordo concretiza. Dia 25 di februari 2008 e minister a aproba esaki, dor di cual e moratorio di 1997 a continua.

Pa e demas tipo di permisionan manera T- (toerwagen), O- (ongeregeld), V- (verhuurauto) y MFV (verhuurmotorfiets) no tabata existi moratorio. E tempo ey no a mira e necesidad pa bin cu un moratorio pa nan mirando cu nan ta liga na e temporadanan y e mercado mes den principio ta regulanan.

Mirando e trend di e uso di e cantidad di vehiculonan di motor pa cual ta duna permiso, DOPV for di augustus 2003 den su Rapport Gebruik en Behoeft na Vervoervergunningen, a tuma den consideracion pa bin cu un moratorio pa T-, O-, V- MFV. Esaki dor cu a mira e tendencia di saturacion den e sectornan aki den cuadro di e calidad den e producto turistico aki.

DOPV ta muestra cu e cantidad di permisionan duna den e sectornan aki, cu excepcion di e permisionan V-, ta mas halto cu esunnan cu en berdad ta wordo usa. Awor e control di empresanan lo mester conduci na e 'intrekking' di un serie di permisionan cu no ta wordo usa, esaki despues di avisa esnan cu tin e permisionan di e obligacionnan di e permiso manera ta e caso cu si nan no usa esaki pa un periodo di mas di 6 luna, esaki por wordo kita.

Gobierno ta conciente cu e hecho cu e cantidad di permisionan duna ainda ta mas grandi cu e demanda y cu esaki a conduci na problemanan den e sector manera por ehempel, maluso di e permiso.

Pa muestra tur transparencia den e aspecto di moratorio, Minister Otmar Oduber a muestra e cantidad di permisionan cu tin na e momentonan aki pa e diferente categorianan di transporte publico:

Toerwagens: 334;

Ongeregeld ervoer: 296;

Verhuurauto's 4211;

Verhuurmotorfietsen: 265.

Awor pa medio di e moratorio di dos aña kier yega na e siguiente cantidadnan di permiso:

Taxi's: 400 (cantidad existente caba);

Autobussen (cantidad existente caba);

Toerwagens: 300;

Ongeregeld vervoer: 250;

Verhuurauto's: 4500;

Verhuurmotorfietsen: 200.

Finalizando Minister Otmar Oduber ta aclarea cu e moratorio aki ta conta pa permisionan nobo solamente, esunnan existente ta sigui valido y no ta cay bou di esaki. E moratorio aki no ta conta pa e autonan di huur tanten cu esaki no yega na e cifra di 4500. na momento cu yega e cantidad aki, e moratorio lo conta tambe pa e autonan aki.

Di e forma aki Minister di Turismo, Transporte y Labor kier trece claridad y transparencia pa cu su manejo caminda cu e meta principal ta pa mehora e calidad di servicio pa tanto nos propio hendenan como nos bishitantenan.